

名

山

藏

名山藏卷之二十二

臣何喬遠恭

典謨記

世宗肅皇帝

世宗肅皇帝御諱厚熄興獻王長子也憲宗十子長  
孝宗次貴妃邵氏子興王興王封楚安陸上生之年  
爲正德二年翼軫見慶雲楚分也正德十六年三月  
武宗崩無子慈壽張太后使駙馬都尉元皇親喜輪  
持遺詔召上時興獻王薨上已除喪年十五矣渡河  
拏舟父老相告曰昔聖天子生年此河清三百里者

三日茲其徵夫四月壬寅上至自安陸大學士楊廷和請從東安門入居文華殿俟勸進上曰此皇太子禮我奉遺詔嗣皇帝遂以癸卯受臣民箋於行殿入大明門日中卽位頒詔除舊以明年爲嘉靖元年丙午遣迎祖母邵貴妃母蔣妃於安陸命羣臣議興獻王主祀封號召故大學士費宏於內閣發御馬監太監張忠于經蘇縉充軍孝陵衛降罰太監谷大用丘聚等有差賜故司禮太監王岳方亨官執巡撫宣大都御史寧杲於京師立故都督僉事馬雲葉旺祠於遼東貴州普安賊阿則阿工得就擒餘黨悉平五月

追贈故諫南巡杖死者金吾右衛都指揮僉事張英  
兵部員外郎陸震工部主事何遵刑部主事劉校刑  
部照磨劉珏大理寺評事林公黼行人司副余廷瓚  
行人詹軾劉槩孟陽李紹賢李惠王翰官秩有差其  
存者翰林脩撰舒芬郎中黃輦孫鳳陸俸張衍瑞姜  
龍員外郎夏良勝主事萬湖林大輅蔣山卿大理寺  
寺副周叙寺正金鑾評事郭五常孟廷柯郝鳳升張  
仕鎬傳尚文蔡時姚汝臯太常寺博士陳九川行人  
陶滋巴思明李錫顧可久鄧顯麒黃國用熊榮楊泰  
王懋李儼潘銳劉黼張岳及它以危言廢謫者皆復

日精門穴閉大理礦禮部尚書毛澄上羣臣所議興  
獻王主祀封號請如漢定陶共王宋濮安懿王故事  
以益王次子崇仁王厚炫封興襲祀上稱孝宗曰皇  
考改稱興獻王皇叔父上曰事大其再議上武宗皇  
帝尊諡廟號錢寧江彬伏誅大賚臣民軍士起故左  
都御史彭澤爲兵部尚書故戶部尚書孫交爲戶部  
尚書右都御史林俊爲工部尚書大學士楊廷和蔣  
冕毛紀乞休不許禮部尚書澄再以興獻王主祀廟  
號請命再議遼王寵沒薨六月縱內苑禽獸大黜罰  
正德中內侍奸黨戮宸濠逆黨于市賜故錦衣衛指

拜僉事年斌韋璽祭賜故巡撫江西右副都御史孫  
燧故江西副使許逵贈廕諡祠南昌曰旌忠兩畿山  
東西河南陝諸郡大旱疫停織絨袍於陝罷遣抽分  
內臣七月存問故大學士劉健謝遷戶部尚書韓文  
祠故太保尚書黃福于昌邑恤故禮部員外郎馮涇  
家使逐葬涇故諫南巡杖死也虜寇莊涼洮岷諸處  
寧津盜起大同卒索糧譁欲亂斬其首五人以徇進  
士張璁獻大禮議請考興獻王伯孝宗稱上意上召  
楊廷和下禮部所上議曰至親亡如父子卿等宜體  
朕心廷和請如議不報八月尚書澄再以前議請命

再議錄副都御史范鏞後賜諡封德世子裕溶爲德王趙世子厚煜爲趙王除皇莊命四方災異重大者立奏毋族類聞九月母妃自安陸至止通毛澄請治王妃駕入王門上曰駕以母后入大明中門朝內廟上諭廷和等曰朕承祖宗鴻業君天下興獻王獨生朕一人旣不得承緒又不得徽稱如罔極何卿等委曲折衷申朕孝焉廷和執議如初尚書澄三上羣臣議陛下以旁支紹正統考孝廟母慈壽不當私所生帝后之上曰事大其再議葬康陵楊廷和再乞休不許山東江西閩廣流賊平是時母妃以尊稱未定止

通旬餘上涕洟啓慈壽皇太后願避位奉藩如故羣臣惶懼十月辛巳皇太后命稱王爲興獻帝母興獻后邵貴妃爲太后壬午聖母入戍安邊伯許泰海南十一月脩武宗實錄論平宸濠功封王守仁新建伯其餘遷叙有差白水江熨蠻普法惡爲變逮四川巡撫都御史馬吳下獄戍故兵部尚書王<sub>鳳</sub>於邊贈故翰林院脩撰羅倫官賜諡張璁再爲大禮或問以獻重建乾清宮成上自文華殿入居之罷廣西香貢逆番寫亦虎仙伏誅誅雲南十八寨賊阿寺等十二月贈保安衛千戶周麒官卹其母妻勅加稱興獻皇帝



興獻后爲興獻皇太后楊廷和封還詔書曰不宜加稱皇上曰哀哀之情不能自己其勉承朕命廷和執奏上曰卿之所言史志大義朕之所奉昊天至思可勉錄皇號毋泥於舊聞廷和復引古議抗章求退上優荅之吏部尚書喬宇等合疏諍上曰慈壽皇太后旨爾羣臣其承之存問故南京禮部尚書章懋

元年正月己酉朔上朝不賀禮科給事中熊浹請尊興獻王爲帝別立廟上徽號如恭仁康定以示不敢躋於列聖加上慈壽皇太后及武宗皇后徽稱而尊母妃爲太后徽號如慈壽以示不敢躋於太后下所

司已未大祀南郊清寧宮後三小房災羣臣以災爭  
大禮報聞廣西蠻賊梁公當寇臨桂等州縣甘州軍  
亂殺巡撫都御史許銘二月上諭廷和上興獻帝冊  
寶文稱子廷和封還不報丁巳上慈壽皇太后尊號  
曰昭聖慈壽皇太后武宗皇后曰莊肅皇后邵太后  
曰壽安皇太后興獻后曰興國太后詔天下幸太學  
禁京師民靡五穀爲酒麪論定策迎立功封大學士  
楊廷和蔣冕毛紀伯爵予世禮部尚書毛澄加太子  
太傅世錦衣其餘有差皆力辭妖賊馬隆平荔浦賊  
潘公銀等流劫桂林陽朔間四月賜故潁國公傳友

德宣德侯金朝興汝南侯梅思祖祠於雲南五月止  
織生綾於浙江封駙馬都尉元爲京山侯皇親喜昌  
化伯輪玉田伯脩一切興來功八月設和平縣虜犯  
邠存問故大學士劉忠命遼東合祀故吏部尚書王  
顥於旌忠祠十月立陳氏爲皇后十一月山東西陝  
西盜起分遣科道官行視發太倉銀賑被寇處壽安  
皇太后崩禮部請服十三日而除上曰以二十七日  
及期猶不忍除也曰山陵未就其考憲宗朝喪錢太  
后禮毛澄言錢太后崩距葬不遠故暫持凶以待今  
山陵尚未且將獻歲不宜縞素臨元會陛下孝思深

摯請止鍾鼓毋御中門上乃勉具黑翼善冠素服烏  
犀帶御西角門還宮仍素朔望罷殿上又欲祔茂陵  
楊廷和曰不可乃地陵稍右焉給事中史道坐外補  
怨廷和上疏詆之廷和疏辯乞致仕喬宇彭澤等因  
劾道御史曹嘉極論大臣相爲地阻言者路廷和宇  
澤皆求去上下道詔獄已外降之調嘉於遠方遼東  
開原大饑免徵樁棚馬價虜掠偏頭關

二年正月上壽安皇太后諡曰孝惠皇太后禮部請  
上視朝鳴鍾鼓鳴鞭服易淺淡色上曰服則更矣鳴  
鍾鼓鳴鞭朕方在疚未可也流賊掠考城指揮趙泰

等及官軍八百餘人死之切責巡撫都御史周季鳳  
等平賊自贖虜入沙河堡總兵杭雄等戰却之劉陽  
賊起流劫袁州二月葬孝惠皇太后河南山東流賊  
平四月命興獻帝家廟樂八佾以災異勅中外脩省  
以宋儒朱熹裔孫墅爲翰林五經博士奉祀于婺源  
祀故工部主事費瑄于呂梁瑄於成化間奉命管洪  
築石壩捍水通漕作石  
堤以便挽者歲省修堤草束役錢各三十餘萬人時  
旱疫瑄設法賑濟全活甚衆民思之私爲生祠至是  
知州張淮以請禮  
部覆議故有是命閏四月醮欽安殿上拜奏青詞楊  
廷和諫太監崔文家人陽鳳等索賄於工部匠銓不  
獲因以他事嗾文杖銓垂死法司未決文爲陽鳳訴

寃請改訊鎮撫司許之刑部尚書林俊執不與上不  
納明日復奏上怒責對狀羣臣諫者八十人旱命禮  
部禱雨南京大疫詔有司加意撫賑五月唐王彌錦  
薨存恤故大理寺丞黃輦家賜故太常少卿張衍瑞  
祭葬六月贈故興化知府岳正爲太常卿山東賊倫  
等掠淄泗諸縣七月工部爲皇后父都督同知陳萬  
言造第尚書趙璜言第近禁且踰制請裁之上怒責  
對狀下營繕郎中寬員外郎璘詔獄已乃釋刑部尚  
書林俊乞歸許之給事中劉最論劾太監崔文調外  
任旣行東廠太監景賢撫奏最謫戍之八月進封壽

寧侯張鶴齡昌國公加慶陽伯夏臣太子太保封陳  
萬言泰和伯予券世襲吏部尚書喬宇言累朝外戚  
亡封公者伯萬言亦非祖宗法不聽九月恤故尚書  
章懋遺孤十月戶部尚書孫交兵部尚書彭澤皆致  
仕十二月江南饑粥民遣太監織御衣蘇杭楊廷和  
喬宇力止不聽已責大學士冕忤慢不草勅趣之  
三年正月大賑江南饑二月給事中鄧繼曾言批荅  
朝旨頃多從中不出閣擬恐二三大臣不得圖政左  
右羣小復竊權希寵如正德時上怒下詔獄謫之許  
大學士楊廷和致仕言官交留不聽南京主事桂萼

請考興獻帝廟大內如張璵言下羣臣議不可上曰  
朕承正統第欲兼報本生恩耳其參議聞遂召萼及  
南京兵部右侍郎席書主事張璵霍韜于京師昭聖  
慈壽皇太后聖旦免命婦朝賀御史馬明衡朱淵言  
興國太后令旦命婦畢賀爲日未久慈壽皇太后聖  
旦輟不行臣恐臣民以此疑兩宮上怒曰免朝自皇  
太后懿旨朕豈有間焉逮明衡等詔獄拷訊翰林脩  
撰舒芬御史季本陳逅戶部員外郎李應驄相踵諫  
抹上奪芬俸本等竝下獄訊謫之三月勅曰聖母昭  
聖慈壽皇太后朕欲加稱康惠加稱興獻帝爲本生



皇考恭獻皇帝興國太后爲本生母章聖皇太后室  
奉先殿側祀獻皇帝焉禮部尚書汪俊曰立廟非禮  
也興者獻帝始封之號請毋去興曰興獻皇帝喬宇  
曰稱本生可也第請毋稱皇上曰朕尊正統亦胡可  
遺所生奉先殿側室也非廟也脩撰唐臯編脩鄒守  
益給事中張翀御史鄧本公等先後上疏極言皆切  
責聳倖汪俊曰廟大內干正統臣不敢奉詔不許下  
羣臣議羣臣曰禮不得立廟則亦不可以建室不得  
主祭則亦不可以追孝請建獻皇帝百世不遷之廟  
於興不許喬宇等再疏亦不許定安陸州松林山曰

黑陵璉等竝上疏陛下入繼大統與爲人後者不同  
必稱孝宗爲皇伯考興獻帝爲皇考武宗爲兄乃名  
正言順不在皇不皇也上悅汪俊乞休許之特以席  
書爲禮部尚書兩廣賊平四川南京主事張璉桂萼  
郎中黃宗明都察院經歷黃綰益上疏譏禮官羣臣  
誣益急上曰朕祇承宗祀孝養聖母豈敢違逆本生  
聖母方躬奉事本生皇考寢園遠在安陸於卿等安  
乎奉先殿側立一室再四命矣尚爾黨同蔑朕冲歲  
其亟如詔旨已酉上昭聖康惠慈壽皇太后尊號庚  
戌上本生章聖皇太后尊號詔天下五月子蔣冕致

仕

蔣冕字敬之全州人年十四舉成化丁酉鄉試第

一

丁未舉進士選庶吉士正德丙子以禮部尚書

尚

書兼學士兼文淵閣大學士武宗多出入巡幸留連塞外冕

與

楊廷和梁儲毛紀疏請前後以十數既自為疏上

之

言尤危切車駕南征與梁儲扈從一時中貴人永

忠

與都督彬泰挾上寵勢張甚然不能親疎駕還加

少

傅兼太子太傅戶部尚書謹身殿大學士武宗崩

與

楊廷和迎立世廟於安陸當迎駕安陸時當內閣

一

人往次者梁儲次者冕其時平虜伯江彬提重兵

討

凌雲中外洶為慮變廷和欲以太后旨推諉之念

冕

有志力欲倚以自輔作為梁儲曰公憊矣恐不任

迎

駕則請蔣公往儲奮曰事孰有大於迎天子者乎

敢

憊辭歸往冕留京與廷和合謀據誅彬世宗即位

勅

加伯爵具辭冕是與楊廷和相得惟甚朕介抗顏侃

侃

大臣體廷和罷而前遣中官織造尚未具草冕卒

不

肯具草上責之引咎而已因移疾不出上優

詔

強之再三乃出居二年以議大禮不合乞歸編脩

鄒守益再疏爭大禮脩撰呂柟上疏極言時事竝下

鎮撫司拷訊謫其官上命奉先殿西室曰觀德殿造祭器如太廟遣大臣之安陸上恭穆獻皇帝冊寶改題神主迎入京師六月教樂內府太常卿汪舉曰奉先殿諸陵故無樂獻皇帝樂用之安陸家廟矣上曰奉先殿無樂見太廟故也皇考不享外庭不得缺樂舞勿輕率矣奏特命張璫桂萼爲翰林學士方獻夫爲侍講學士吏部尚書宇言內降恩澤被之佞幸小人非所以施臣士大夫不許羣臣大攻璫萼御史段續陳相吏部員外郎薛蕙鴻臚少卿胡侍言尤切上竝切責焉下續相蕙詔獄拷訊謫侍潞州同知七月

許喬宇引疾乙亥先期諭禮部更定皇太后尊號曰聖母章聖慈仁皇太后去本生侍郎朱希周曰本生之詔未三月又復母之無以信天下不許吏部左侍郎賈詠翰林學士豐熙皆諫上怒姑宥詠下熙詔獄於是九卿大臣吏部左侍郎何孟春等及在廷諸臣皆上疏極諫跪伏左順門大呼高考二廟聲聞上所上使慤止之不退至于日中上益怒命叔繫爲首者脩撰楊慎王元正首觸關繼以哭上大怒盡繫之己卯上聖母尊號諸大臣異同不赴者竝切責之甲申獻皇帝主至自安陸帷於正陽門導迎如車駕旣入

奉安觀德殿上率羣臣上冊寶大學士毛紀乞休許之八月復史道曹嘉官調何孟春南京工部侍郎逮杖伏闕者編伍削職有差杖有死者遂下席書方獻夫聰萼前後所奏疏命羣臣再議羣臣乃議如上旨九月丙子更定大禮尊號詔曰朕本憲宗純皇帝之孫孝宗敬皇帝之姪而恭穆獻皇帝子皇兄武宗毅皇帝上賓之日仰遵聖祖兄終弟及之訓屬朕倫序當立遺詔命嗣皇帝位昭聖康惠慈壽皇太后以朕入繼三年于茲矣尊稱大禮屢集廷議輒引漢定陶共王宋濮安懿王爲據至再至三朕心靡寧蓋伯姪

父子天經地義豈人爲乎況漢宋二君衣裳垂御豫  
立爲子朕入奉宗祀在宮車晏駕後實與不同以爲  
繼嗣亦非我聖祖初訓豈徒禮官之失殆朕冲年不  
能選擇之咎也朕祇奉九廟尊養二宮正統大義未  
嘗有間惟恭穆獻皇帝章聖皇太后朕父母也劬勞  
罔極位號未正因心之孝每用歉然已告于天地祖  
宗社稷稱孝宗敬皇帝曰皇伯考昭聖皇太后曰皇  
伯母恭穆獻皇帝曰皇考章聖皇太后曰聖母各正  
厥名清旣心稱禮無悖也夫篤近舉遠御于家邦以  
孝言順事成興厥禮樂以名朕庶幾古帝王之盛焉

大同卒殺都御史張文錦回會速壇滿速兒等入國  
肅州命兵部尚書金獻民兼都察院右都御史往禦  
乃定之十一月蘇杭織造太監勳志聰誣奏浙江布  
政使馬卿杭州知府查仲道長洲知縣郭波典史蕭  
景腆皆逮問十二月大理寺右評事韋商臣言平獄  
臣職也竊見羣臣以議大禮忤旨調任者吏部右侍  
郎何孟春一人以爲首謫戍者學士豐熙等八人決  
杖病瘡死者編脩王思等十七人

王思泰和人王直曾孫也弱冠舉于

鄉求文信國像奉以出人正德六年進士選庶吉士  
授編脩時有倖進爲臺諫所糾慨然乞別授或咎其  
立異曰鄙夫非尚同也乎哉九年上封事請瀕享太  
廟孝養兩宮不可嗜酒荒志好勇輕身維是任喜怒



移威柄弛紀綱推士氣召天變言甚切至謫三河驛丞嘉靖初召還翰林至是以預伏闕號諫下獄杖朝堂越十四日遂不起思資稟犖奇磨礪切至視豐稟崇卑如鈔狗吳廷舉稱之曰犖然其節似徂徠松溫然其和似崑山玉呂柟稱之曰聞以織造抗中使逮過而喜似仲繇欲寡未能似蘧瑗

訊者布政使馬卿知府查仲道等若而人以送迎忤中使逮訊者副使劉秉鑑知府羅玉若而人以京堂臺憲官爲所屬吏民訐奏下獄者少卿樂護華湘御史任洛副使任忠若而人此皆獄之大者臣敢僭爲陛下評其失願陛下復戍者之官錄死者之後釋逮繫之刑正妄訐之罪天下稱仁焉上曰商臣買直沽名降二級外調之大同卒再叛圍代代王夜亡宣府

以戶部侍郎胡瓚總制軍務捕治之總兵桂勇千戶苗登計擒其首惡居二日卒復攻戮勇登家命瓚督諸將擒之士魯番犯甘涼諸處金狀民戰敗之

四年正月大同卒平代王還代

大同兵素強悍自江彬擅調後益恣肆先

是元年七月以得解弗給象象欲亂提督侍郎鄒鳳巡按御史張欽捕得首惡疏請置法詔戮為首者五人餘調極邊哨守大同城百里許為小邊小邊之外為大邊其地皆膏腴議者謂宜撥軍築五堡其地以禦寇巡撫都御史張文錦欣然奏行分大軍三之一戍之文錦故擒宸濠有功游至是官顧其為人剛嚴諸軍稍稍怨之又諸軍十如族貴產皆在大同咸不樂往參將賈鑑受文錦命督築號令嚴峻衆益憤怨於鑑裂其屍奔屯焦山文錦招之還因康埔其首惡諸卒復怨糾集焚大同府入行都司縱獄囚攻圍文錦文錦走匿宗室博陽王所叛卒擁圍王索之王懼出文錦遂殺之亦裂其屍開諸城門焚鎮守總兵公

能勿犯宗室勿掠倉庫勿縱火殺人予能主若否不  
能衆曰諾因膺副總兵時陳爲奏乞宥巡按御史王  
官以事聞上各文錦撫取失宜激衆致變命兵部左  
侍郎李昆宣勅曲赦之改宣府都御史李鐸巡撫大  
同陞都指揮桂勇署都督僉事代總兵以宣府副總  
兵靳英代時陳各題令速往仍令團營內外官選鋒  
聽征戶部預備糧餉俱以密勅行事鐸尋以母憂去  
陞山西按察使蔡天祐代之時大同人心稍定屬國  
虜犯甘肅方遣尚書金獻民等西征復卒聞之益自  
疑十一月辛未復相煽聚殺大同知縣王文昌代王  
凌仗都御史蔡天祐疏不敢盡言也兵部以聞于廷臣  
奏卒稱亂狀天祐疏不敢盡言也兵部以聞于廷臣  
集議皆舉戶部左侍郎胡瓚詔瓚兼左僉都御史總  
督宣大軍務復命都督曾綱充總兵官調兵次大同  
近地相機撫剿瓚等以十二月辛巳發京師御史土  
官言重兵壓境人心動搖乞且留瓚聽其與鎮撫官  
密圖捕逆於是始言文昌見殺事上責官奏事推延  
不早聞者且勅與瓚等協同贊決是月庚子桂勇與  
千戶苗登、紳等計擒首惡郭鑑等十一名揭示勸

旨斬首梟示隨撫定之越二日堡軍郭巴子等復起  
拒城殘勇家屬燬登紳等家於是璦請率兵臨境設  
法擒獲上責天祐等令擒賊自璦乃令璦暫駐宣府  
俟事平班師召莊勇還以朱振代之是年正月天祐  
等擒首惡徐璽等四人璦等遂班師三月庚午天祐  
復捕獲郭巴子等四名助逆焦璽雲等三十四名以  
事平聞命賞天祐等銀幣有差血文錦卹典廷臣  
爲上言皆不許巡撫江西都御史陳洪謨言文錦邊  
圉重臣付託不効誠宜加譴第事在朝廷誅夷日甘  
若假手士卒又從而慙憑之傳之四方羣小藉口寢  
階凌替國家紀綱所損不小乞量加優卹上謂洪謨  
出位妄言降旨切責之

西虜寇甘肅

總兵姜瓖禦之苦水墩敗之改致仕大學士楊一清  
爲兵部尚書督撫陝西三邊軍務三月御史王懋郭  
楠先後乞優恤議禮臣之死杖下者上謫懋爲邊典  
史逮治楠民之脩獻皇帝實錄仁壽宮灾四月黃屋

顯陵殿改陵署曰監衛曰顯陵衛日本使宋素卿論  
死罷市舶絕其貢光祿寺署丞何淵請立世室祀皇  
考太廟下禮部議不可命再議張璫桂萼與議亦不  
可曰臣故言當考獻皇帝廟京師耳不敢言祀太廟  
也五月上曰豈敢干太廟世室之建從古有之朕非  
敢僭擬帝王功德惟我皇考撫誨朕躬罔極難忘觀  
德殿祀大內百官執事不得禮焉謂孝思何於是禮  
部請別立廟闕左不與太廟同門祭川次日上曰可  
四時獻享朕率百官親之名廟世廟世世子孫無遷  
也六月廢慶王台浚爲庶人七月追封下殤母弟岳

懷王下殤女弟二人爲常寧公主善化公主十月開  
宇溫爲唐王祐揆爲淮王徽王祐檠薨何剡復言世  
廟不與太廟同門則請同門於廟街上令亟議羣臣  
皆爭竟從淵言十二月刊布太祖御製洪範序及御  
註無逸伊訓三篇爲一書曰書經三要閏十二月乙  
卯朔日有食之以大禮集議書成進席書太子太保  
諸與上議者皆陞實授一級以璵萼爲詹事府詹事  
獻夫韜爲少詹事降岷王彥汰爲庶人

五年三月畿內饑粥貸之天方國夷使貢玉奏求金  
帶蟒衣主客郎中陳九川選其玉格奏不與覆提督

會同館主事陳邦稱復禁毋使貿易夷人皆怨通事  
士紳等故憚九川嚴詐夷書上之上下九川錦衣訊  
刑科給事中一貫等言陛下不逮士紳不下夷人所  
上奏獨拷掠九川等兩造不具不聽竟坐九川戍黜  
邦稱爲民五月丁酉月食召楊一清復入爲吏部尚  
書武英殿大學士加少師兼太子太傅刑部尚書趙  
鑑致仕御製詩送之六月甲子召大學士費宏楊一  
清石瑄賈詠於平臺各賜詩一章七月以詹事張璁  
爲兵部右侍郎伊王訐淵薨上曰觀德殿前掩奉慈  
殿無以準奉先朕意未稱今欲改建奉先殿左也江

部尚書趙璜言孝宗皇帝建奉慈於奉先殿右奉紀  
太后錢太皇太后邵皇太后同享焉太皇太后則獻  
皇帝聖祖母皇太后聖母也建奉先殿左必並峙奉  
慈恐在天之靈不欲班之且奉先殿雖度高祖宗列  
聖所同也觀德殿雖度卑獻皇帝所獨也今外有世  
廟之規內有觀德之專勿更便席書曰建世廟民勞  
矣請寬之歲所上諭費宏曰紀皇太后不得配皇祖  
考憲宗是以建奉慈錢皇太后不得配皇曾祖考英  
宗是以奉慈同享之人未有無父母者觀德掩且隘  
遷于東豈害禮也費宏曰陛下永言終慕臣等敢不



奉詔製世廟樂用文武舞重舉主連坐法以覈吏治  
九月辛卯安獻皇帝主世廟奉皇太后入謁十月御  
製敬一箴箴曰人有此心萬理咸具體而行之惟德  
是據維敬維一所當先務匪一弗純匪敬弗聚元后  
奉天長此萬夫發政施仁期保鴻圖敬怠純雜應驗  
頓殊徵諸天人如鼓荅桴朕荷天眷爲民之主德或  
不類以爲兢懼惟敬惟一執之弗固畏天勤民不遑  
寧處曰敬惟何怠荒必除郊則恭誠廟嚴孝趨肅于  
明庭慎於閑居省躬察處儆戒無虞曰一維何純乎  
天理弗參以三弗貳以二行顧其言終如其始靜虛

無欲日新不已聖賢法言備見傳經我其究之擇善  
必精左右輔弼責于忠貞我其任之鑒別必明斯謂  
之一斯謂之敬君德既脩萬邦則正天親民懷永延  
厥慶光前裕後綿衍蕃盛咨爾諸侯卿士大夫下迨  
毗庶一遵斯謨主敬協一罔敢或渝以保祿位以完  
其軀古有盤銘目接心警湯敬日躋一德受命朕爲  
斯箴奉奉希聖庶幾湯孫底于嘉靖復註范浚心箴  
程頤視聽言動四箴頒示翰林臣封厚燭爲徵王勅  
儒臣韻編尚書要事以爲法戒編脩孫承恩因彙括  
古今君蹟獻詩六十章上嘉納之賜名君鑒韻語十

一月甲午月食張璠力攻費宏宏求去上兩留之曰  
以教協恭十二月時四方災異疊奏水旱雷雨地震  
山崩以數省或米雹大如人頭捲裂民舍百數十家  
江南婦生子六目四面有角手足各一節獨爪鬼聲  
河南生牛犢一身兩首鄖陽牛產二身心肺膽各二  
江西虎具人手足大學士楊一清以脩省上言勅曰  
覽卿疏者再論之至切朕涼寡冲昧日夜惟治未盡  
知民欲求直言言或不實朕過多不自悟其悉陳之  
庸開朕心毋忌以不盡頃之勅羣臣曰比者坤輿弗  
靖乾象失常風雨水雹水旱之灾物怪人妖疊報曾

見靜言思之疾實在朕爾文武羣臣亦宜洗心去垢  
交脩成治曠職疎官則有國典張璪力攻費宏宏五  
上疏上竟優容之

六年正月總督兩廣都御史姚鏌平田州改置流官  
今四品以上及六科十三道條民間疾苦具上便宜  
足消弭災變者己丑大祀南郊以災罷慶成宴四川  
橫江賊阿狗戍平勅大學士費宏曰朕承統以來朝  
夕惟我皇考聖母尊稱未定命諸禮官考詳輒引近  
世繼嗣之說名實不稱廢壞綱常賴天賜良哲正直  
之士力贊朕志尊尊親親各當其位位號已定廟祀

已成可無全書貽諸來世特命爾宏與少師兼太子太師吏部尚書謹身殿大學士一清少師兼太子太保吏部尚書武英殿大學士瑤少保兼太子太保禮部尚書武英殿大學士詠少保兼太子太保禮部尚書書爲總裁官兵部左侍郎璵詹事府詹事兼翰林院學士萼爲副總裁官詹事府少詹事兼翰林院侍讀學士獻夫韜原任河南布政司左參議決福建都轉運鹽使司宗明翰林院脩撰春編脩承恩道南用賓治南京工部營繕司員外郎綰禮部儀刑司主事潢祠祭司主事存仁爲纂脩官彙成大禮全書稱朕

正名崇孝至意欽哉二月虜犯宣府中路參將王經  
力戰死之初楊廷和草卽位詔革罷正德中傳陞官  
錦衣衛千戶邦奇在革中兵部尚書彭澤如詔革之  
邦奇怨追奏哈密失國繇澤廷和大學士費宏石瑄  
皆廷和黨并論廷和子兵部主事惇女壻脩撰承勛  
等他事上方以議禮惡廷和遂下惇等獄令鎮遠侯  
仕隆等會鞫之給事中楊言言宏瑄天子師輔百官  
之表小人得怨構之非遠陞高堂之道且廷和有擁  
衛功卽所擬詔不當上指心無他也去國亡何不得  
庇肉骨上怒朝繫言竝治之御史陳察陞呼曰臣察

願易言也獄上上責仕隆曲護褫惇職爲民間住承

勛調言於外任宏瑤因乞致仕皆許之仍名謝遷於

內閣

石瑤字邦彥藁城人與兄玠同登成化丁未進士被選庶吉士弘治己酉授翰林院簡討正德

己巳爲南祭酒時閣瑾用事以勵精爲名上大當官亦附會振剛瑤教法雖嚴濟以平恕故北祭酒嘉靖初以禮部尚書致吏部黜陟公明不移權勢輔臣有不悅者陰奪之權託辭以請命仍兼學士在內閣兼管誥勅前此未有也嘉靖甲申奉手勅兼文淵閣大學士是歲爲正邦奇所構不辯求去疏再上得謝職民車歸私第瑤爲翰林掌院時武宗狩宣大疏請回鑾又疏扶諫南巡諸臣之得罪者前後所上封事如勸上清心省事法堯舜之恭已無爲用漢文之與民休息又願上力行王道辯別忠邪中人皆可用之才不必求備平易有近民之實不必務奇治有端緒不必責効於見事可包荒不必刻鵠夫察淵人謂掾時樂石爲人沉厚寡默遇難事徐出一二語輒中窾會有不當者憤激見詞色人或謂其過直少量久

乃服之卒贈少保諡三月虜復寇宣府入大白陽堡  
文隱陸變初攷文介參將關山死之上以宣府一月兩喪軍逮治其當事  
者追錄死事王經以郤永爲宣大總兵起故兵部右  
侍郎馮清提督軍務遼東大饑發太倉銀給之改作  
觀德殿成更名曰崇先四月洛容古田蠻賊反遣內  
官織造南京科道諫不聽五月丁丑朔日有食之呈  
露禱暑輟經筵命翰林官撮經史大義日一進楊一  
清請進大學衍義上從之曰日一講不得其精微其  
以五日進因製大學衍義序聽講詩二篇示羣臣田  
州岑猛餘黨盧蘇王受復叛起故兵部尚書新建伯



王守仁兼左都御史同姚鏌計之六月賜死宸濠者  
瑞州知府宋以方贈廕藩王銓鉦薨七月禮部右侍  
郎桂萼請令科道官於考察拾遺之後互相糾劾如  
憲宗初年詔旨下吏部議吏部言憲宗初年無此詔  
萼近屢被論劾似欲以報復言官恐不足厭衆心昭  
公論爭者久之上竟切責吏部趣行如萼請吏科都  
給事中俊民御史隅等言臺諫自相批抵開攻訐之  
門非盛世事亡已則請聽吏部都察院再行考核不  
願自相糾也上責俊民等方命朋規奪其俸已命部  
院覆考考上上曰朕聞兵科都給事中自壁一門三

龔清議有乖戶科給事中奇被劾勘問居位自如不  
此指摘乃以漫塞命其降自璧奇二級外調之桂萼  
請召用王瓊治邊吏部言瓊坐甘肅事處死幸而脫  
戍其罪甚明萼欲召瓊臣不識所謂上已之念其老  
姑與解戍御史胡松劾萼妄薦樹黨上怒外調之御  
史周在言陛下不用瓊則萼薦誣矣萼留松謫是股  
肱耳目一體異視也上復怒下在錦衣衛拷訊萼薦  
瓊益力上重違萼意先復瓊官令需補八月套虜大  
入總督尚書王憲與總兵鄭卿杭雄等大破之論功  
有差上又推叙楊一清先任之功特進左柱國兼華

蓋殿大學士支二俸改大禮全書名曰明倫大典湖  
廣水蠲賑之九月吉王見浚薨山西妖人李福達故  
賊也亡命變姓名曰張寅怨家告於巡按御史馬錄  
錄捕之急福達亡入京師以方術干武定侯勛勛寓  
書錄爲居間錄劾上勛書是時勛方附璫等得幸廷  
臣惡勛競言勛黨賊請用連坐法上詰責勛勛懼賂  
上左右爲飛語上動移繫福達詔獄逮馬錄廷治之  
語有變上怒廷臣黨同陷勛也無爲國愼刑者如是  
則朕親聽焉楊一清言庶獄不足煩天子乃收繫刑  
部尚書顏頤壽都御史聶賢以桂萼張璫方獻夫三

人者兼視三法司事復廷決三人新貴川事因欲破散不附已者立威乃大治諸臣頌福達寃出之上大怒曰羣欺至此耶戍錄與故讞者極邊奪頤壽及故都御史張仲賢大理寺卿湯沐官其他大小臣論戍削逐者四十餘人而大學士賈詠亦以貽錄私書致仕去上親勞璵萼獻夫賜服二品追贈其二世頌先後獄詞於天下曰欽明大獄錄以霍韜爲翰林院學士方獻夫爲吏部侍郎桂萼爲禮部尚書兼翰林院學士尚書兼學士自萼始封許淳爲伊王厚烷爲鄭王經扶爲靖江王十月以張璵爲禮部尚書兼文淵

閣大學士兼掌都察院事如故製顯陵碑文召南京  
刑部尚書李承勛爲吏部尚書未至更以刑官非人  
特改刑部加秩太子太保命勉副敬獄上曰朕念謹  
政而聞過今錫卿一清璵鑾萼人銀記二用識密封  
自古明良儆戒交脩朕之不明資嘉猷焉是時上重  
講筵史局之職欲盡內外諸臣文學政事之材乃外  
徙翰林選外臣文學者入補之潞城青羊白坡賊陳  
卿等爲亂十一月濬天津海口新河趣中外恤刑使  
著上爰書事竣刑部核而黜陟之上曰畿輔軍民田  
上奸民多投獻豪家豪家撻而逼之租稅民失常產

何以爲命京師如此在外可知其推戶部侍郎及科  
道官各一人往勘之在外御史按行母問皇親王府  
功臣家一體核籍上雪露禱宮中代王俊杖斃十二  
月黃河清靈寶上曰鹽錢二法大壞於私販私鑄何  
以濟民足邊聞京師市中私鑄流行前代舊錢及我  
朝通寶悉阻格今何道令官課疏通私錢禁絕也者  
戶部速議聞因命鑄嘉靖通寶制錢上諭楊一清曰  
國家幸無大警然安不忘危團營第一重務也廷臣  
有蓄威習武者卿集舉使治之旣舉不稱上意上特  
改李承勛爲兵部尚書兼都察院左都御史加太子

太保提督營務勉以展誠而布忠命太醫院判紳視  
楊一清目疾齋賜羊豕米酒諸物與札曰新春伊邇  
望卿良切卿日稍可便赴閣視事懇朕懷也一清言  
禮辨色入朝君日出視之仰惟陛下勵精圖治不論  
疾風嚴寒昧爽設燭雖云宵衣之心聖躬得無過勞  
臣又竊聞陛下日將視朝皆先以鷄鳴禮奉先奉慈  
崇先三內殿朝退聽講閱奏殆無虛晷臣切惟三殿  
之建本以義起非廟也卽爲廟亦宜清靜闕血使神  
有依禮不欲數請第於朔望四時節候一拜二叩如  
臣子常見君久儀又開導嗣儲造端夫婦誠不可不

重上曰卿言真師保愛君至意朕之蚤朝先官情也  
子孫敬事先人敢以勞解但我太宗初建奉先時五  
廟日五拜而已今九廟神位奉慈三室崇先親廟倍  
之有餘節忌祭告禮又倍有餘朕成弱促喘穿繞登  
降實難如儀當如卿言朕大昏且七載矣深慮承傳  
其於后與二妃具接之以禮御之以正惟多慙色荒  
爲兢兢聊諭卿知見朕心慎微云爾

七年正月上將以丙戌祀南郊加張璪少保兼太子  
太保桂萼太子太保勅曰古者人君接大臣無時今  
且郊旦日扈從卽謝於齋宮母陛見令久任巡撫二



月勅禮部曰古聖王制玄端以燕上下同之夫人脩明而怠幽故聖王重焉朕酌古玄端稍加文采襯深衣色用黃更名曰燕弁製成用之庶幾深宮獨處以戒燕也比者達官顯士俗同市井走卒役廝濫擬儒流禮曰不知其名爲罔又曰不學雜服不能安禮善與人同令從君出復酌其製名曰忠靜許在京七品以上官及八品以下翰林院國子監行人司在外方面官及府州縣正官儒學教官服之武官許都督以上服之庶幾乎進思盡忠退思補過者也以回夷入寇哈密戍甘肅巡撫都御史陳九疇於極邊黃河清

靈寶者五十里遣太常祭謝御史周相諫繫謫之三  
月以兵部右侍郎王廷相兼都察院右僉都御史提  
督延寧邊防修理牆塹勅張璁曰見卿帶不佳特賜  
玉帶其以札報母廷謝予謝遷老雲南武定土舍鳳  
朝文作亂以右都御史伍文定爲兵部尚書提督雲  
貴川湖等處軍務調四鎮土漢軍討之南贛都御史  
汪鉉進甘露賜白金文綺薦祖廟遣侯勛告郊壇上  
亦廷謝焉羣臣請賀上却之曰災變屢生朕先天戒  
四月勅曰比者風霾蔽天旱潦連聞地震同日羣盜  
密邇京師夷虜跳梁咎實繇朕君臣共理皆天事也

文武羣工宜加省悔大者會奏小者立改庶民懷無  
怨朕亦免於多戾虜入山西乾溝墩號一萬圍遊擊  
邵定軍命惠安伯張偉掛平虜將軍印充總兵官備  
之五月思恩田州平六月明倫大典書成勅曰朕以  
末文膺天紹緒實惟我祖宗列聖積累垂延亦惟我  
皇考聖母鞠育誨導底于成立卽位六日輒下議尊  
崇禮大學士楊廷和謬主濮議指示禮官尚書毛澄  
不能執經擬正附朕與爲人後之倫朕思皇兄遺詔  
乃遵我太祖兄終弟及之訓大義甚明朕繼統非繼  
嗣若如前云奪我父子大倫民彝泯亂屢命廷議廷

和等力主定恂濮王不倫之典妄稽曹魏偏安私已  
之言鼓衆要朋一倡百和期於必勝已而執禮之臣  
先後論列本聖稽經尊尊親親各得其序凡有人心  
孰不憬爽廷和等猶執迷不返蔣冕毛紀汪無救止  
轉相附和都御史林俊起用遠方著論迎合尚書喬  
宇六卿之首不秉正抗說乃與九卿等官交章妄持  
汪俊繼爲禮部尚書勦說如故吏部郎中夏良勝恃  
銓選之權脇持庶官堅厥邪志何孟春以侍郎掌吏  
部事鼓舞朝臣伏闕喧騰肆無敬忌朕初雖有非彼  
之意然而信道未堅屢以大性開諭使相體悉廷和

等怙終違詔及朕稍長重賴諸臣正論見之已真詔  
令三更大禮始定比者大典書成備載羣言邪正具  
見奉天行罰垂戒後人朕今日事也然猶不欲已甚  
姑從寬輕衰次焉廷和貪天之功制脇君父國老定  
策自居法當戮市特革職爲民次則毛澄病故削其  
生前官職又次冕澄宇俊皆已致仕各革職冠帶閒  
住林俊已故亦革去生前官銜孟春雖云貳卿情犯  
特重良勝雖云部屬釀禍獨深皆發原籍爲民其餘  
大小官員當時連名入奏然有人代署已不與聞者  
有心知其非口不敢吐者或與夫當時已正法典成

及民者茲皆不再究焉嗚呼凡昔脇從諸臣自今毋  
懷憂疑勉思圖新顧不美歟原朕弗敏弗聰亦追省  
夙愆不敢恕也開禧通惠河鳳朝文平七月己卯追  
上孝惠皇太后尊號曰孝惠康肅溫仁懿順協天祐  
聖太皇太后恭穆獻皇帝曰恭睿淵仁寬穆純聖獻  
皇帝上聖母徽號曰章聖慈仁皇太后詔天下九月  
罷總督河道右都御史盛應期止開新河之役勅曰  
今災傷比比川陝湖廣山西尤甚不急賑大蠲豈父  
母哉往歲災傷僅免存留糧數南之兌軍北之邊輸  
如舊夫百姓所苦正在起運若存留之數又有祿俸

粟糧之類不可缺者通融處補待熟帶徵多虛文耳  
其令災重者盡蠲今年起運數稍輕者勘覈停徵或  
量與折納冬寒在邇明春青黃不接之時尤爲可慮  
府州縣其速散倉上貧之家不足則益以官帑之閒  
空者起運如不可廢卽以兩淮等運司鹽價及諸他  
徵未用者量補之更發送太倉銀或補或賑毋令失  
所戶部宜推行朕意都察院令內外官員條奏採荒  
良策及凡不便者十月罷討芒部兵名伍文定還虜  
上萬餘寇宣府總兵趙瑛時陳等擊却之陳皇后崩  
降靈皇后發引山陵封觀燒爲魯王閏十月新

廷伯王守仁以討田州兵轉攻斷藤峽叛賊平之青  
羊山賊陳卿等平御製十六字箴曰卓爾之見一貫  
之唯學聖君子勗哉勿偽十一月上曰寒風猛疾山  
中宜甚朕聞行殿護大行皇后梓宮者猶自齎糧梓  
宮重人命尤重也官軍朝夕霜霰無衣褐何以支持  
朕念若裂已膚尚書承勛其與番班少甦之戶部便  
給發人糧馬料工部人給胖襖袴鞋一事畢還以聞  
勅曰朕散白金二十萬給大同芻粟因思遼東宣府  
偏頭陝西寧夏甘肅皆邊也戶部卽行諸巡撫考倉  
場告匱者給予之上曰朕聞河陝民相食戶部不賑



抹鎖巡官不奏聞耶其以實對立順妃張氏爲皇后  
十二月勅曰朕酌古玄端爲燕弁冠服推錫有位曰  
忠靜尚念宗室未備未卒圖之也光澤王有請實獲  
朕心朕更酌之命曰保和冠服服郡王長子以上夫  
上下之分猶天地然各知其分然後能以和相保而  
國家治安也其將軍中尉長史以下冠服一用忠靜  
制郡縣鄉君儀賓非儒官比皆毋得服親親有殺尊  
賢有等矣禮部頒圖說諸王府其如勅

名山藏卷之二十三

臣何喬遠恭輯

典謨記

世宗肅皇帝

八年春正月戊戌朔風霾晝晦立春日長星出白氣  
亘天勅輔臣條書急務諸脩省弭災毋有不盡凡郊  
祀太常寺博士書祝版填御名是月郊上親填御名  
於祝版自是爲故事二月以桂萼爲大學士奪新建  
伯守仁世爵禁其學旱河陝川湖大饑人相食甲申  
上禱雨南郊及山川壇乙酉禱社稷勅曰今天下錢

穀及京師太倉具有歲奏月報他如後府柴炭銀團  
營子粒太僕馬價但有奏請支用朕不聞其幾何夫  
節用所以愛人也豈得無訾省戶兵工三部其亟覈  
之歲終獻會稱朕不傷不害之意焉命天下府州縣  
朝覲官陳利病於布政按察二司二司類奏其可行  
者部院條議之以潞州青羊山賊平改州爲府曰潞  
安置平順縣上曰比聞問刑之官往往深刻取名或  
意嚮上司或偏徇已見甚者鍛鍊賄與囑占者一夫  
寃而三月亢一婦憤而六月霜况多乎哉都察院其  
令撫按督同三司等官行歷所屬審讞重囚有坐抑

者具矜疑以奏其有被訪察論戍及累誤非律正條  
與非人命賊私者皆奏處以請徒杖以下情輕有詞  
卽時赦之若有玩慢參實降黜兵部馬人馳示焉三  
月葬悼靈皇后大峪山權附主奉慈殿孝惠太皇太  
后側以禱不雨作自咎文名工部大庫曰節慎辛亥  
月食五月增定大明會典許土魯番貢七月民張福  
母死告里人柱殺之東廠奏下刑部郎中魏應召鞠  
獄則福殺母也於是廠部爭獄上怒命三法司錦衣  
衛鎮撫司覆按之左都御史熊浹奏如應召擬且請  
再集廷臣詳讞上意浹下比褫浹職下應召考訊之

給事中陸粲言福柱之獄親鄰有口福姊至情尤痛憤不勝決旣援之定獄復請廷獻蓋其愼也陛下誠敬庶獄明經辜宜令離而問之參而聽之厥衛天子詔獄可訖以威法司多心寃者今敢亢爭恃聖明也風紀大臣一不當胥吏斥之母傷國體乎在敬皇帝時徐珪以小吏訟丁哲寃敬皇帝卽收罷哲之命兼錄徐珪之美臣願陛下齊威虛已近法敬皇帝給事中劉希簡亦言部院厥衛忠國之心莫不齊同獄幽而旨嚴臣恐羣臣妄意窺測虛誣轉甚上大怒下粲等錦衣衛考訊竟坐柱罷決應召鄰證俱適爲邊軍

月給事中孫應奎陸粲王準先後論劾張璉懷恣  
桂萼貪濫狀上怒曰朕以璉萼爲朕止父子之名委  
以重任乃頓失前志朕不敢私璉其解相還省圖後  
用萼奪散官學士職銜以尚書致仕因下二臣罪大  
治其黨與上曰應奎首發璉萼若可赦也粲準不蚤  
言非本忠竝逮問謫其官詹事霍韜意一清爲之詆  
一清上前甚急上復曰老臣乃負朕又下一清狀於  
九卿使自劾劾上予歸遂召璉還復萼散官職銜如  
故上曰利道官無一言一清者非附卽畏其各奪俸

三月

陸粲字子餘一字浚明長洲人貫穿經史練達掌故博識古今奇字嘉靖丙戌進士被選庶吉

士連七試居百館中故事所無茲館簡五人充史職  
祭復居第一內批改授給事中與情駁異亦故事所  
無蓋張桂用事祭與同輩不肯往揖張桂嫌祭之故  
有是命祭為給事中數言事既以論張福祿事下詔  
獄廷杖驗月釋之適奏黃河清自靈寶達平陽凡六  
日廷臣欲稱賀館僚畏祭言而止至是草疏論聰夢  
時已夜分有鬼嘯庭祭笑語之曰吾為言官義不容  
嘿豈懼禍哉言既嘯寂疏入聰夢生致仕都下謹稱  
奇男干梓其疏者售獲大利既岳倫王準疏繼人與  
俱下詔獄霍韜上疏抵辯上意頗回聰夢還政祭論  
貴州都鎮驛丞與倫準偕出都城有賦三生行美之  
者壬辰遷永新知縣與盜安民交戶不閉邑二年致  
仕士民攀號追送不絕

車駕祀山川復國初禮九月製武弁十

月癸亥朔日有食之上素服乘輿撤鹵簿大樂入享  
太世二廟封厚焟為吉王罷外戚侯伯世封乾清宮  
中西七所房災上露禱天地祭告秦先詔百官脩省

十一月御史劉安上疏臣聞治可緩圖不可急取也  
可休養致不可督察成也躬有司之事摘臣下之失  
出而復反信而忽疑大小臣工救過不暇則有不安  
其位之心其位不安則其志不勇孰能爲陛下建久  
計策長效者哉臣聞君道貴明不貴察朝廷四方之  
極也內而君臣習尚如此則外而撫按州縣風從響  
應急察相名竊恐民窮有起盜之繇食寡無強兵之  
理伏望陛下重本根養元氣不乍怒於一毀不驟喜  
於一譽不遽行一人之言不旋止一人之忤老成非  
懦與貪則無輕棄言臣非奸與佞則無輕罪上曰安



要名賣直下錦衣衛杖鞠之并逮究訟安者給事中  
胡堯時再名相桂萼刑部員外郎邵經邦奏詩十月  
之交刺無良也茲日食陽月象符小雅得微皇父之  
人上代天工張璠尋去尋留衆議洵洵謂陛下私議  
禮之臣夫禮與政不同也議禮貴當政要必公陛下  
以議禮德璠乃不察忠邪不揆才量信使無間是私  
議禮之臣也私議禮之臣則所議者不爲公禮矣可  
守也亦可變也可成也亦可毀也陛下何不於此諸  
臣厚其賚賜全其終始以酬其勞博選海內重碩之  
賢置諸左右講明勵翼與建正大光明之治無使其

竊盈蹈滿犯天人之怒生福過之殃臣抱此區區竊  
効茅焦之義昧死以請上下鎮撫司嚴訊適充軍曰  
父子天綱也孰可守變成毀者經邦自比茅焦何如  
視朕上曰深冬不雪朕憂朕罪朕其自禱凡百官毋  
從禮部臣曰孰敢百官不從天子許之戊申禱南郊  
巳酉禱社稷遂雪上曰人君事天如親親歡于有不  
私慶感荷好生末展朕誠其親告謝用玉帛樂舞焉  
十二月定百官朝祭服圖頒式中外

九年正月壬辰朔告郊於太廟丁酉郊丙午享太廟  
世廟故事告內殿享先郊上曰非所以敬天尊祖乃

告於太廟郊畢而後享吏科都給事中夏言請行皇后親蠶禮上大悅勅曰古者天子親耕王后親蠶以勸天下朕甚慕之今歲朕躬祀先農禮部其議皇后親蠶禮勅禮部曰朕冲昧承祖敢違舊章惟是禮義之實重且大也朕每祭太社太稷奉配我太祖太宗則心疑之天地至尊次宗廟次社稷奉祖配天正也配社稷屈之矣且夫父之不善乃及子乎以共工廢勾龍者我皇祖時禮官失也其以后土勾龍配社后稷配稷如國初之故三月戊辰祭社稷畢祭先農東郊耕籍夏言請分南北郊上悅上曰書稱燔柴祭天

又曰類于上帝孝經曰郊祀后稷以配天宗祀文王于明堂以配上帝夫屋祭謂帝壇祭謂天今大祀殿屋耳合地祇焉又非天也又大明夜明當異壇禮曰大報天而主日配以月是也僅歲一從郊祀禮歟其下羣臣議三月勅諭吏科都給事中夏言曰爾請復古耕蠶朕甚嘉焉夫成王賢君周公猶儆于無逸朕何人斯斯實爾忠茲特賜爾四品服色其益勵乃心懋乃前功政事可否天下治忽凡有見聞直陳以副朕望霍韜夏言爭郊上怒下韜獄羣臣議郊不稱旨上曰其復我皇祖初制分南北郊以二至日行事皆

配我皇祖以大祀殿祈穀配我太宗擬明堂焉爲朝  
日夕月壇舉之於二分大學士璉曰一祀天也孰若  
竝配二祖上曰祖宗竝配不見經傳太宗功德茂盛  
不獨靖難攘夷鼎于燕都實惟朕玄系豈不可配天  
者天一天祖亦一祖也儀監于周武王成之僅后稷  
配天文王配上帝不及武王也禮部臣曰不可得兼  
請竝配于祈穀土勉從之出霍韜丁巳皇后蠶北郊  
延綏大饑賑之四月革鎮雄府流官復授芒部土裔  
隴勝爲通判署府事奪故大學士楊一清職閒住勅  
曰近者遠邇饑莩流亡無算下民何辜重遭斯厄今

屢重守令而黜陟不明久廣儲蓄而備貸不舉凡當  
祭神祇皆能禦捍灾患多有慢者死國軍士或冒賞  
而泯其功欽卹蠲免累命之矣乃誣枉者不悛派辦  
者不止至名爲激揚實挾德怨若斯之類難以枚條  
此皆朕小見所及爾部院大臣百僚首當加勉佐朕  
安民表率其餘者焉脩南京太廟五月躬祭告上帝  
宗廟興工于園丘迎翠殿南織堂成六月河南巡撫  
都御史徐讚獻瑞麥賜銀幣行薦告禮頃之巴縣人  
亦以瑞麥獻京師人又言瑞禾生郊羣臣稱賀眞定  
諸府大旱禱北嶽總制尚書王瓊破降番夷若籠板

爾二族賜勅褒諭之七月兵部主事趙時春言中外  
屢言瑞應禮官再請稱賀大小臣工浮詞而謾不能  
上體君父警災求言之意上怒下詔獄黜爲民八月  
沙汰天下附學生員戶部主事梁喬升請終養吏部  
覆請從之俟親終服闋起補上譙之曰人子忍預言  
親終者所以教孝耶移祀太廟功臣姚廣孝大隆興  
寺告皇祖太宗焉九月兵科給事中高金奏曰陛下  
以姚廣孝髡緇之流遷祀佛寺闢邪崇正大聖人作  
爲也官祿所以勸賢爵賞所以礪世邵元節一道流  
耳賜號真人衣紫腰玉實累聖治望加削褫上曰真

人封賜久矣胡今乃言金似忠實非錦衣其逮問之  
刊高皇后傳文皇后內訓章聖皇太后女訓於天下  
命皇后授妃嬪宮中使翰林官詩詩書內則之言以  
備闡門謠誦順行陰之時端婦教之本焉十月纂輯  
郊議成書曰祀儀成典以夏言爲翰林院侍讀學士  
兼都給事中十一月戊子園丘成上躬視之辛丑園  
丘習儀禮畢宣大學士璵禮部尚書時幕次日有誤  
否卽以聞甲辰視牲南郊乙巳誓百官奉天殿已宣  
璵等華蓋殿御榻前戒以臨期恭愼上贊事天之敬  
丙午告配于太祖已酉始以冬至郊還御奉天殿羣



臣行慶成禮赦天下庚戌大宴封充燿爲代王上曰  
朕惟孔子道王者道德王者德功王者功事王者事  
也直位非王者位焉周衰孔子削誅諸侯僭者亂臣  
賊子懼春秋後世至唐玄宗乃薦諡曰文宣加王號  
元人益諡爲大成此不體其心者也我聖祖崇祀孔  
子學宮於天下沿前代禮不卽毀像蓋不忍也聖人  
尊親乃與天同我皇祖考採禮官八佾十二邊豆牲  
用犢直擬諸事天孔子或在安享之否昔不觀魯僭  
王之禮寧肯自僭事天禮蓋稱王賊害孔子甚有是  
德宜居是位堯舜是也無是德居是位桀紂幽厲是

也繇是觀之王名不足重孔子章服冕旒皆王名生  
昔曰名不正則言不順事不成何不幸身遭之哉坐  
令顏回曾參孔伋以子而配於堂上顏路曾皙孔鯉  
以父而食於廡下也此繇以王名橫加孔子來者也  
今也不可滋後之非道朕將防閑萬世焉乃爲正孔

子祀典申記示羣臣集議十三道御史黎貫等諫阻

上怒褫職爲民

賈字一卿從化人正德丁丑進士選庶吉士與進賢舒芬關中許宗魯臨

清閭閻輩以志行相砥擻館授監察御史劾卷福建兼查盤有司倉庫軍衛器械効奏鎮守太監尚春追還官銀十三餘萬兩糧二十六萬石前此使命未有也元舅蔣翰求以其子主獻皇帝祀選除奉祠世襲且多所干索貫劾奏神不饗非類以外戚主陵祀非禮不可行且求乞無厭如他日驕恣如薄昭王鳳則

莫不可圖矣上優詔答之三邊有警論列大監晏宏  
都御史王珣當罷舉致仕尚書楊一清代之上如其  
言甲申巡按江西寧藩宗室有被宸濠株連者悉從  
末減有得濠黨日求守仁巡撫江西書者衆多疑守  
仁貲曰此間謀也衆乃釋然至是疏上汪欽迎合張  
孚敬意欲重罪之刑部尚書許瓚獨不可會上怒稍  
解乃罷羣臣如上指議上上曰其尊孔子曰至聖先

爲民

師母王四配皆稱子十哲以下稱先賢左丘明以下

稱先儒母公侯伯殿稱廟像易主兩國子祭用十簋

十豆天下學宮八簋八豆樂六佾別立叔梁紇祠曰

啓聖公以四配之父配兩廡申黨申枏一人也其去

黨存枏罷公伯寮秦冉顏何荀况戴聖劉向賈逵馬

融何休王肅杜預吳澄祀歸祀林放濂瑗盧植鄭玄

服虔范甯其鄉祀后蒼王通歐陽脩胡瑗者四人稱  
朕尊師重道之意設詔安縣通惠河成十二月臘御  
製蜡樂詩祈嗣太廟世廟撤文華殿釋像親告奉先  
崇先祀伏羲神農黃帝堯舜禹湯文武周公孔子焉  
禮畢不釋皮弁而名璵鑾時等九臣於西室曰朕祀  
先聖先師于此庶幾朝夕敬慕而自律贊沃交脩卿  
尚罔朕棄少選勅曰朕告祀先聖先師于祖宗皇考  
祖考聖師豈不鑒以教朕惟爾輔臣講臣其各解經  
書大旨一章切于身心政事者人自獻其忠毋通聞  
雷言庸副朕志加贈故江西副使許達禮部尚書以

贈太常寺少卿黃宏光祿寺少卿馬思聰配享南昌  
祠除夕製聞講詩賜夏言

十年正月上日祖宗時三途用人取之至廣厥後專  
科舉之學進士遂重士浮無實而蠹國害民者比比  
繼今務遵累朝之舊求得人焉辛卯始祈穀大祀殿  
奉配太祖太宗旣祭上諭璵曰祖配天古也配太宗  
非禮自今大報祈穀其專奉太祖配上問大學士璵  
裕大裕也今擬以歲暮裕兼節祭固似寔未協也四  
孟皆裕太祖不得居尊歲暮裕兼節若輕於裕也者  
莫若三歲舉以季冬中旬詎日行事正旦冬至二節

祭朕謂宜行內奉先殿不宜於太廟又始祖自有自  
出祖當設衣冠禘之而以德祖配天夫自出之祖雖  
不可考直不知耳豈無神耶卽人何嘗見鬼神無之  
則不必祭鬼神也朕又惟人君父天母地與諸侯卿  
大夫士庶不同今歲一祀天祭地宗廟乃五享卽謂  
尊不敢瀆則未免踈之也程子言古人一歲九祀天  
惟大報重又譏後世有三歲一舉者今已大報於迎  
長祈穀于上辛而大雩大享尚缺或古禮當復之時  
卿悉心究之璵對上上曰太祖開運肇基不宜列子  
孫太廟太祖廟也當南向享之列聖生南面至爲宗

不得南面享終未稱人情卿曰歲一禘朕恐同常祀  
又曰大雩旱禱也朕意禮曰龍見而雩古人用心不  
見是圖恐非專爲旱耳卿又曰大享之義爲大報簡  
致委曲焉又曰祭文王朕謂皆非也古人必有意矣  
孟春旣祈故季秋報之今已存祈穀之祀當亦不可  
無報也乃敕禮部曰朕仰惟太祖高皇帝重闢乾坤  
開基肇運德鄧功懋不南面享不稱子孫孝敬之情  
聖祖時尊德祖南面固當其在今日當崇聖祖矣其  
以歲孟春行特享禮絲太宗而下同日南面祭幄之  
夏秋冬三享仍相向祫太祖廟如今禮以季冬中旬

諫曰大裕尊德祖居尊合享懿熙仁三祖于太廟移  
親王功臣配食兩廡下明君臣之義歸二節祭於奉  
先焉甲午告廟祧德祖奉太祖南面丁酉特享于太  
廟大內東偏火露告皇天祖考爲火警文命天下提  
學官選有學行者應歲選二月章聖皇太后聖旦上  
獻寶輿爲壽丁卯祭歷代帝王文華殿戊辰耕籍祭  
先農封祖陵曰基運山皇陵曰翔聖山孝陵曰神烈  
山與天壽純德二山並從方澤祀庚辰始祀大明朝  
日壇改賜張璁名孚敬三月敕禮部曰仰惟太祖高  
皇帝肇造洪圖克享天心必自上世之積累乃啓中



夏之元聖顧追報之典未舉冲昧之懷罔遂朕已躬  
承皇祖鑒命以茲孟夏吉恭行大禘祀始自出祖太  
廟奉皇祖配歲辛丙輒一舉著爲制冊淑女方氏鄭  
氏王氏閻氏韋氏沈氏盧氏沈氏杜氏爲九嬪告廟  
受賀上以皇后出蠶北郊未便欲移內西苑并定土  
穀壇省耕焉乃幸西苑趣召大學士孚敬尚書時相  
度中官渡過太液池入見舊仁壽宮還報命昭和殿  
手授御製西苑賦使共和因手書賦賜三臣彙曰咏  
和錄上諭孚敬朕惟朝則君臣嚴燕見當若家人禮  
朕冲昧淺世故卿可無時閒見陳說計度待朕性志

有定乃可以廣應接盡羣下四郊皆成名西苑土穀  
壇曰帝社帝稷賜李時銀圖書一曰忠敏安慎以夏  
言爲少詹事兼翰林學士套虜合西海賊入犯莊浪  
至于甘上曰吏部尚書古稱冢宰朕惟公明忠亮之  
人茲付廷推以協有衆上曰州縣親民之官今天下  
之廣進士僅一二往詔兼用舉貢監生吏部竟踵舊  
弊發身進士者選取不必賢能舉貢十不得一監生  
百不一焉人何繇自致其一體著爲令庚子祭西苑  
帝社帝稷建歷代帝王廟于京師進誠意伯劉基侑  
享太廟四月丁巳皇后薨西苑甲子禘皇初祖於太

廟名南郊神版殿曰泰神殿兵工二部火上疑吏貪緣燬簿書逮署兵部事左侍郎陳洪謨及武選司官詔獄除名爲民五月丙午上禱雨殿陞壬子夏至始祀地方澤六月丁巳雷震德勝門破民屋柱死者四人癸亥擊午西華二門樓戒百官脩省御製祝文露告于殿陞閏六月裁冗官盡罷鎮守內臣詔求劉基常遇春李文忠湯和鄧愈後爵之彗星見七月陝西大旱螟順天水悉蠲賑有差行人司正薛侃坐妄言爲民太常卿彭澤以邪譎謫戍并令張孚敬致仕以夏言爲禮部左侍郎鄭王貢白鵲二薦太廟八月癸

未始祀夜明夕月壇戊戌祭帝社帝稷升安陸州曰  
承天府縣曰鍾祥割當陽潛江景陵三縣隸之四川  
白草番平陝西總制尚書王瓊進甘露薦內殿兩宮  
觀穫幽風亭名諸臣入侍既打場上取穀傳觀之曰  
聖祖有訓衣帛思織食粟念農粒粒辛苦今日不特  
紙上見之而已九月丁卯上親祀雲雨風雷嶽鎮海  
瀆基運山諸神及京畿天下山川之神罷南京郊祀  
名大學士翟鑾尚書李時左都御史汪鏐侍郎夏言  
等西苑仁壽宮上曰陝饑已遣戶部侍郎相以三十  
萬金賑之今相病誰代者時曰陝撫臣劉天和可鑾

曰河南撫臣徐讚可言曰始陝告饑今聞亦歲上曰民天民也死亡流徙若之何不揀夫吏部侍郎唐龍者何如時對曰善上曰吏部尚書缺孰可時曰諸臣之才惟陛下知之上曰雖然朕宮居焉能盡者鑾曰九卿之臣惟陛下擇焉上曰則序遷矣以問汪鉉鉉曰曰臣時臣言皆可時對曰臣不稱戶部尚書臣讚可上曰卿朕將有所用之戶部亦須才也朕欲用王時中於刑部王憲於兵部王瓊於吏部則皆何如對曰善上曰其卽改龍兵部尚書兼左副都御史總制陝三邊代王瓊行賑政頃之以李時爲大學士夏言爲

禮部尚書脩西苑宮殿畢上曰文祖之御也爲位而祭旣祭賜落成之宴宴布席上召李時曰尚書王時中蔣珪胡殿外也對曰殿隘上曰其移皇親席殿西對曰國戚也上曰親親不如賢賢遂席時中珪殿內上幸西苑御無逸殿命李時翟鑾坐講無逸幽風篇遂賜宴幽風亭下曰朕將省耕而親學嘉瓜產曲周薦內殿十月改行祈穀於圓丘泰神殿石座成上親行奉安神版禮罷改遷顯陵議虜寇大同眞州盜周天星等平十一月封胤移爲藩王召故大學士孚敬建祈嗣醮欽安殿以禮部尚書夏言充醮壇監禮使

侍郎湛若水顧鼎臣充迎嗣導引官文武大臣遞日進香上親行初終兩日禮十二月御史喻希禮言議禮議獄諸臣得罪遠戍若量移近地或赦免之則人和薰蒸胤祥自兆上曰朕之遲胤坐罪言耶讐君怨上鎮撫司其刑鞠之沙汰天下附學生員饑免被灾諸郡王瓊既被召南京御史馬敷等十人言瓊小人也先朝餘蠹不可以主爵上怒悉械治之京師吏科都給事中魏良弼疏抔皆逮付鎮撫司拷訊已乃論贖還職

良弼字師說新建人嘉靖二年進士授松陽知縣以學爲治民化而思之尸祝及其殤

爲給事中數言事輒被杖輒言事京師日爲鐵黃門嚴乞歸張孚敬與吏部汪鉉以考功條中之示錮不

用良弼少從學王守仁講學化行閭里爭訟爲之寢  
息隆慶初錄舊人以老進太常寺少卿致仕年八十  
卒

十一年正月賑畿內災桑西苑壬戌醺欽安殿祈嗣  
丙寅視祈穀牲於南郊辛未祈穀上疾始遣代獨配  
太祖焉造雩壇二月上祀先聖先師文華殿嘉禾產  
斬水薦太廟三月張孚敬至進兼太子太師華蓋殿  
大學士虜寇延綏已巳皇后蠶內苑上曰朕已釐正  
天地百神祀宗廟獨未復古於心歉然朕觀聖祖始  
建四親陋漢制矣今太廟卽如故卿言其更相度昭  
穆世數廟次會議以聞四月令進士無得遽考選科



道官五月大祭地方澤始遣代封常遇春八世孫玄振爲懷遠侯李文忠七世孫性爲臨淮侯鄧愈六世孫繼坤爲定遠侯湯和六世孫紹宗爲靈璧侯六月封劉基九世孫瑜爲誠意伯八月彗星見甲午祭歷代帝王吏科都給事中魏良弼秦鰲等以彗星劾奏孚敬專權宜罷

鰲吳人仕至布政使雅馴謹約詞理淹濟

上復予孚敬致

仕召見李時等於文華西室諭脩省意十月翰林院編脩楊名疏言上喜怒失中厝施未當當奮力自省以消天異上詰之名對上怒謫戍邊兵部侍郎黃宗明論揀外調之御史郭弘化言採木湖貴百姓頓苦

萬狀應天常鎮五府陶埴嘗不貲率逃亡珠池民窮  
盜劫廣州皆足上千天變臣聞井居東方其宿木彗  
出東井皆土木頌興之致請一切罷上怒敕對狀黜  
爲民南京御史馮恩以彗再見悉疏在廷大臣行事  
請黜陟大抵力排張孚敬方獻夫汪鋐薦李時夏言  
可相上以其譏評藏怨德逮京治之虜掠過西海至  
寧夏十一月南京右副都御史萬鏜言治天下之道  
切要有效謂之實觀聽徒美謂之文吉凶悔吝生乎  
動勞費紛擾出於文者也陛下當積德百年之期行  
稽古三重之道議禮制度考文至明備已乃臣子責

難之義蒼生厚望之心則於大學所稱理財用人詩書所稱安民講武或猶闕焉伏願輟聲容之煩飾畧太平之虛觀回運神謩專務於此以靜制動以實先文期吏稱民安食足兵強而後已則省事可以省慮上足培萬壽省事可以省費下足紓萬民上大怒謂鏜快快也者爲不遷也黜爲民四川巡撫都御史米滄獻白兔受羣臣賀羣臣皆獻歌賦詩頌

十二年正月右副都御史王應鵬奏疏失列職名下鎮撫考訊給事中良弼等言履端之始請薄罰之上謂君臣先嚴嚴自大臣始良弼輕率論抹不恭君父

并逮治奪俸革應鵬職已御史陳邦敷申抔亦謫之  
獲白鹿於靈寶河南巡撫都御史吳山以進獻廟呈  
兩宮受羣臣賀復召故大學士孚敬三月馮恩逮至  
刑部尚書王時中擬戍上革時中職閒住奪侍郎聞  
淵等俸郎中張國維員外郎孫雲各降邊方雜職恩  
坐上言大臣德政者律論死繫獄三月幸太學皇后  
親蠶于內苑巡撫應天都御史陳軾得白鹿於無錫  
以獻上曰鵲兔鹿有疊至重出者禮部其宣示天下  
自今非正瑞勿復獻於是吏部尚書汪鉉作詩三章  
美上謙德上褒荅焉晉王知烺薨虜大掠宣府永寧

城四月張孚敬至復賜繩愆弼違忠良貞一二銀記  
詔天下博求曾子嫡裔襲五經博士如顏孟二氏五  
月上演馬南城還御環碧殿召孚敬時獻夫鑾同觀  
之馬有玉麟飛白玉馴碧玉驕照夜璧銀河練瑤池  
駿飛雲白凡七因使中官領四臣看花嘉樂館上乘  
玉麟飛轉御重華殿召論時政賜酒饌服色賦君臣  
同遊詩越三日復召見西苑寶月亭駕過清馥殿示  
御製詩四章命立和之分簪以芍藥花退覽四臣和  
詩於翠芬亭使中官徧領觀花樹賜茗飲酒饌退六  
月彗星見上曰彗四見矣朕擇日祇祭便殿文武羣

臣其痛加脩省八月辛未朔日有食之皇子生文  
下上曰仁義恩威不相揜也槩寬恤非王政以大禮  
得罪者奪君父以大獄得罪者殺人媚人其與馮恩  
等皆毋宥九月告廟賜皇子名不降勅十月上疾享  
廟代復故大學士楊一清官建昌侯張延齡下獄論  
死上考問薄昭故事焉皇子薨諡哀冲太子大同卒  
再叛殺總兵李瑾閑大同城代王奔宣府使宣大總  
制都御史劉源清與總兵卻永討之源清力主勦決  
水灌圍城城中人盡驚賊益猖獗劫囚勾虜殺遊擊  
安等數十人十一月上疾郊遣代十二月虜犯寧夏

總兵王效梁震大破之

十三年正月廢皇后張氏立德嬪方氏爲皇后始率  
皇后行謁廟禮二月上諭張孚敬曰朕病中未嘗不  
念大同事叛軍殺主將於法難原顧未敢上逆朝廷  
且非合城人所爲也郤永信從劉源清貪功嗜殺計  
訛傳洗城驚恐城中以致劫囚勾虜抗拒旣云專勦  
逆徒脇從不問乃又決水灌城玉石烏得分也朕惟  
宣大北門京師人而無臂曷衛頭目哉此地此民皆  
我祖宗所遺源清果欲城破人殲忠乎否也卽幸成  
功後來曷興復今不老師傷財耶因奪源清職以張

瑣為兵部左侍郎兼右副都御史代之瑣隨與部中

詹榮主事楚書撫定大同軍代王還代上二年冬虜

塞外大同總兵官李瑾議于天城左孤店等處浚濠

塹四十里遇之赴日計工督并嚴急瑾馭衆素刻不

得士心役與益怨十月六日夜有亂卒王福勝王實

等六七十輩鼓噪焚帥府攻瑾殺之因焚鎮署剽掠

代王為疏奏瑾實峻法禁亂宜撫總督劉源清都督邵

永以事聞請下兵節尚書王憲言悍卒習亂殘害主

帥此而不誅天討安在請出榜諭安良善逮其脅從

盡捕諸渠魁置之極典上日逆軍蔑視國法屢肆叛

亂其本源清等隨宜處置使國法大伸惡逆殄滅毋

得更事姑息因以都督僉事曹綱代瑾從之行敝數

上疏為亂軍可命都給事中會汴等劾源清永將至

以江西北參政樊繼祖代十一月癸卯源清永將至

大同出榜曉諭有五堡之變朝廷處之太寬等語五

堡遺孽見榜偶語不自安且謂追理甲申年事也師

典謨記



之源清疑不聽倣督總兵趙鎮僉事孫允中管糧郎  
中詹榮遊擊戴濂等捕亂卒扶死十餘人檻諸囚詣  
軍門允中謂源清請旋師徐圖之又五堡事朝廷已  
處分今公幸勿言源清曰曩胡總督以兵不臨城致  
言者紛紛吾不可蹈前轍迺以囚屬御史蘇祐拷訊  
因妄言前總兵朱振失職怨望實首亂又多株連無  
辜者源清遣參將趙綱率甲士三百人大索城中比  
晚城中訛言且屠城逆黨遂夜呼噪爲亂殺千戶張  
欽會元中歸自源清所諗意推之迺復定源清爲書  
召振疑其不來疏請逮振詔欽振詣幕府自明因言  
亂黨就逮且盡可無煩兵不許振發憤自殺明日兵  
至城下大却殺掠城外橫屍枕藉五堡遺孽逐相糾  
集開門迎戰殺遊擊曹安等數十人攻四關廂據之  
晝夜圍擊益發庫兵出前參將黃鎮指揮馬昇楊麟  
於獄奉以爲將永築塞城門決水灌城倣與鎮國將  
軍俊樞等諭止之不聽俊樞出見永請緩兵亦不聽  
永因揚言大同欲奉一王子召虜兵南襲金陵以撼  
朝廷源清次聚落驛允中鶴城出調言將上妄殺狀  
源清欲囚之允中遂留居懷仁不敢歸源清所設羣  
卒遣戍中王有及有司軍民誹章流布請益師至五

萬糧餉器械稱是又言城中衣冠之族悉已從賊尚  
書王憲以爲然疏請得旨選聽征官軍萬二千令趙  
御任鳳傳鐸充左右參將將之兵部左侍郎錢  
如京兼副都御史都督僉事江桓充總兵官督領以  
往令戶部右侍郎張瓚督餉給事中僉朝安同御史  
蘇祐紀功已而曾忤等言往歲大同兵變桓實總兵  
災悞辱國今不可再上責兵部舉用非人今於勳臣  
中求之憲復推遂安伯陳鏜宣城伯衛輝靖遠伯王  
瑾時上悟大同小變不足煩重兵報曰源清永已  
專責總兵官及錢如京可無往第令趙卿率兵聽源  
清調發紀功員巡按御史給事中亦不必遣居數日  
潘倣疏言兵變已定源清及永貪功妄殺以激亂之  
及今班師副可遣已源清則深詆倣謂其煽賊取憐  
殆非人類時大學士張孚敬力主源清議舉朝助之  
惟禮部侍郎顧鼎臣黃綰言用兵之非然不敢疏陳  
也官兵團城久城中樵採路絕叛卒乃撤王府及諸  
公署民屋爲薪夜縱城撤屋多爲官兵所獲城中大  
困兵部徵諗上旨乃復下招安令許首惡黃鎮等亦  
分日來見且丐薪炭路永許諾翼日城中人出樵採  
永悉執之城中人滋懼及源清永令監招降幟叛卒

名山藏

卷之二十三

世宗二

三

悉取裂之截其竿時時開門突我兵互有斬獲已復  
潛勾虜至永出視管陣遇虜伏棄馬易服而遁我兵  
叛卒遂引虜十餘騎入城指穴守日以比爲鄉類  
滿城皆巷哭虜衆不敢進明日攻東南二關叛卒張  
樂宴虜酋東城關內因與犄角我兵殊死戰虜亦頗  
有損失明日乃驅叛卒爲先鋒急攻東關門者大半  
死虜知叛卒不足賴且所許金帛多不售遂反刀擊  
之大詬而去是時虜游騎南掠至朔應諸郡源清告  
急請遣使募九邊兵且請增總制官禦虜已得一  
攻城上不許源清乃北道攻城募黨夫穴地入城卒  
以毒煙燠之穴中死者相藉源清復請築甕壘水灌  
之上等念攻大同城徒令玉石俱焚而源清亦知不  
可爲自効求去上責源清避難負託奪職閒住兵部  
請并罷祁永上謂提督與總制不同且永素著謀勇  
留之遂改督餉侍郎張璜爲兵部左侍郎兼右副都  
御史代源清總督軍務頃之虜引退大同叛卒有隨  
虜北者虜虐使之往往復奔歸城圍久外攻益急諸  
叛卒慮士民有變乃排根先後所不同計者宰閩室  
賊之城中人情辭是乖刺大同管糧郎中詹榮者有  
機畧密與祁指揮紀振遊擊戴濂鎮撫王寧血盟討

賊乃陽命寧持軍較士庶狀詣源清永巡撫樊繼祖  
巡按蘇祐爲黃鎮等乞原而陰以榮等謀告繼祖  
計所出寧謂馬昇楊麟爲叛軍所逼非其心且昇威  
行賊中今勢蹙亦思自免誠貸其死令討賊自效卽  
叛卒可立盡第須捐數千金募死士耳繼祖許諾以  
其謀告源清永源清業已解任欲收後效乃檄榮入  
城而上所遣兵部主事楚書覆視書備以上意檄示  
城內於是宗室官生人等出城迎震書入諭歡聲雷  
動其夕昇麟等遂擒黃鎮等九人斬之次日繼祖輕  
車赴鎮昇麟復先後捕斬首惡許章等凡二十六輩  
餘無所問而瓚馳至城下令諸路兵退三舍以示無  
它諸將以次上謁次日與御史蘇祐張鼓吹自南門  
入集諸文武將佐置酒高會遵詔格賚有功將士城  
中自宗室而下無不閤二月令禮部左侍郎黃綰往  
室來相慶自是大定閏二月令禮部左侍郎黃綰往  
大同撫賑勘處金星晝見自去冬十一月至于是月  
其明爭日四月上疾廟享代五月祭方澤代上曰乃

者朕靜息數旬元氣已復咳未除也念身爲治本不  
得不慎愛之慮爾百工曰不我先茲復申告其勉秉  
恭勤毋有所惰上御重華殿召大學士孚敬武定侯  
勛等五人入觀祀天青爵作紀樂同遊詩命各爲奉  
制紀樂賦因賜五臣扇曰與卿同涼七月南京太廟  
災甲子聞上曰擇日齊沐而廟愍禮也人子赴父母  
變何待正衣冠其卽以丁卯詣告天遂廟愍八月勅  
曰太宗皇帝遷都北京定鼎億祀卽我太祖在天之  
靈歆顧之矣一天下二主二廟非禮也朕惟南京廟  
可無重建併入香火於奉先殿其故廟址垣之若曰

奚廟於承天將非厚親薄祖則曰不敢廢舊邸也且孝宗之建也猶南之有奉先殿卽今承天家廟亦勿廟名曰隆慶殿倣南奉先殿意焉虜吉囊大入榆林塞寧夏總兵王効延綏副總兵梁震擊却之造神御閣南內奉藏列聖御容下爲石室金匱貯寶訓寶錄九月建九五齋恭默室于文華殿後爲齋所楚王桀滅薨十月上曰朕幼父病率五七日解今者深痰火間作無常御朝固欲以靜養消除之尤爲郊祀不親二歲也故專攝俟大報恐羣臣不悉謂朕偷安禮官播諭之南京兵部主事劉世龍上言大臣羣僚表率

勲戚國家故舊陛下誠知大臣之才可托則禮之宜  
優不宜倏斥倏用或因事械繫或捶楚之張延齡憑  
寵爲非盛滿不戒寘之重辟無足惜地恐無以慰孝  
宗在天之靈安昭聖太后垂老之心上以世龍訕上  
庇逆命械繫京師治之十一月郊製大報歌於齋宮  
十二月戊申月食選淑女以備九嬪禮部請廣求之  
兩畿河南山東上曰本廣嗣也使者四出擾民民謂  
朕色荒其第選之京城內外

十四年正月壬戌朔以憲廟恭妃初喪輟朝上諭吏  
部都察院曰朝覲考察國家大典被黜者不得奏辯

又不叙終身近者部院徒事詢訪人得行私相報復  
今考察邇其一以撫按考語科道論劾爲據撫按等  
官有謬賢否者則卿參奏之雪諭閣臣禮官曰天賜  
時玉未得與卿一見禮部尚書夏言因獻天賜時玉  
賦丙戌夏皇后崩二月始分建九廟重脩太廟改作  
世廟暫奉八廟主于奉先殿獻皇帝主于崇先殿祧  
廟四主于太先殿上朝日改百官上陵禮春清明秋  
霜降著爲令更定內殿祭忌去樂三月上大行夏皇  
后尊諡祔葬康陵毓德景仁二宮成定四時廟享皆  
以厥照行事罷脫馬禮四月暫時享奉先崇先二殿



張孚敬病札諭曰惟近古之君剪鬚療臣今朕有自  
驗飲子特賜卿服後告朕何如有頃孚敬力乞休許  
之賜勅予傳遣行人御醫伴送使有司給月米歲夫  
時致存問初薦新麥內殿賜百官麥餅壬辰始策試  
貢士許穀等於奉先殿以大行皇后喪也上親賜制  
曰朕思首自三代末迄宋終雖世歷有久近君年有  
長短皆自其何如爲君耳周所以久本文武積累亦  
繼者能持之也朕皇祖高皇帝代天覆世重肇中華  
功德振古太宗繼述草創之初列聖遵承大定之後  
百有六十餘載傳之今日朕以支人冲年承位幼弱

不才多招苗於民庶茲永思祖宗創造萬艱惕然悚懼圖所以保洪業於無窮有隆弗替不知何以得此朕心慕之思之故進爾多士于廷爾多士可罄告朕朕將親擇而勉焉已親覽次之賜韓應龍等進士及第出身有差復親試庶吉士得進士趙貞吉等三十人庚子大行皇后主祔廟更定宗廟雅樂大興隆寺火遷祀姚廣孝大隆善寺遼東廣寧卒亂械繫都御史呂經徵經下獄以都御史任洛代之五月癸酉祭方澤其日陰霽天爽上悅六月減馮恩死戍之甲辰月食七月暫時享奉先崇先二殿禮部臣請百官預

習萬壽賀儀上曰廟建未成祖考未妥朕辰敢賀至  
日常服御殿如朔望禮尚書言言皇上厚自貶以明  
孝而臣子不能抑誠其日請常服御殿百官公服鴻  
臚寺具班首官致詞行五拜三叩頭禮許之御史曾  
紳戴銑論劾南京兵部尚書劉龍刑部尚書聶賢工  
部尚書王紵戶部左侍郎張雲刑部左侍郎陳璋工  
部侍郎甘爲霖大理寺卿掌國子監事吳惠南京太  
常寺卿洗光巡撫甘肅右都御史趙載請罷之下吏  
部覆尚書江鉉皆議留上譙鉉曰安得比相譽是聞  
官人亦阻直言因召大學士時面論之上謂龍誠人

也其才鈍上謂賢衰矣宦成怠上謂章光皆老矣上謂縱介不通上謂雲愿人也上謂爲霖才人也上謂惠無華國之文不如宋也上謂載才無過因分別去

留而奪鉉俸一月御史曾鉉平廣寧亂卒

初巡撫遼東副都御史

史召經以苛刻失衆心遼東諸衛所每軍一以餘三供之每馬一給牧田五十畝其來久矣經檄行清革每軍給餘丁一餘悉編入衛屬追牧馬田名佃徵輸絲是衆益怨之是月經巡視遼陽檄將吏並城築國牆及臺將吏希經意督役嚴急諸軍遂大噪擊擁詣經丐罷工及免馬田租都指揮劉尚德以中軍爲經信用時適在傍叱衆退不應經怒告者將咎之衆盜開寺起殿尚德及指揮李錢經舍皇路垣走差苑馬寺幽室中衆軍遂取徭役籍焚之鳴鐘鼓糾衆毆途人授之械亦盡開諸城門出故遊擊將軍高大恩十獄欲擁以爲主尋圍苑馬寺按得經盡裂其衣冠執付都司公看時巡按御史曾鉉按部金復聞變行

副總兵李鑑榜撫安凡經所指置爲衆不便者悉罷之於是亂軍稍稍就約束城門始開高太恩自投於獄銑遂按遼陽分部將士令操守巡警如故乃奉奏高德等逢迎經失老字狀而爲軍士乞原先兵變之起也總兵劉淮以聞上如兵部擬令巡按御史會同總兵官按實撫諭爾軍令歸營伍丁田一如其舊革尚德職監候聽勘而取回經別用之至是銑奏至下都察院左都御史王廷相言往年大同逆軍戕害主將罪在不宥撫臣輒爲請赦蓋一時偷生之計猶可說也今軍士未有反叛之迹而乃罪尚德以激變事情法律兩不相合且首惡未及正罪而各官參論大小不遺是豈法理之正詔下兵部再議以聞兵部終以銑言爲是請卽懸榜省諭其間端誼譚者不過數人聽巡按御史查實逮問上從部議華陞都察院左會都御史薛三可爲言臣等竊思經提督人廣寧治裝中軍都指揮袁璘者素諳事經擬扣諸軍月糧草價爲飭裝其悍卒于蠻兒等徂遼陽前事復鼓衆倡亂出獻囚囚中有張孝兒者先以積惡爲經摘發尤恨經遂率衆持挺陪院門人執經數之毀膚拔髮裸而置之衛獄耳娼婦一人同桎梏之據守

五門復入院聚諸公牒并經私園縱火焚之延燒公署遂破庫劫旗幟分其黨爲四部鳴鑼鼓竟日夜明日驅經及璘四首揭標環遊五門間孝兒且行且批其類窘辱備至隨復繫之獄脅管糧郎中李欽吳索經所減草價及冬衣布花舊額且要給賑濟費帑銀幾萬兩復脅鎮守太監王純總兵劉淮等各疏言璘阿經激變請逮京問而乞遣放總兵卻永侍郎問述赴遼撫鎮於是禮部侍郎黃宗明言前者遼陽之變固生於有激今重賦苦役皆已改正竊然而起誰復激之此於法不宜復寬貸部覆得旨竟從純等請遣官較速經璘及各官有罪者下按臣逮問止邢奇母行以山西巡撫都御史任洛巡撫遼東而以邢奇代洛兵部等請遣大臣往勘上命工部左侍郎林庭弼兼會都御史以行是時撫順城備禦樂指揮劉雄亦爲其部卒王經等所囚雄以招寇斂怨經等夜擁衆入其室盡掠其囊篋執雄與其子勳連頸反縛之置諸空館閉城門鳴鑼鼓一如廣寧而官較逮呂經者至廣寧諸軍疑詐爲天使謀脫經也復噪亂擁經及官較置諸獄總鎮官諫以禍福乃出官較被繫事疏中未經付官較行洗具以其事聞然官較被繫事疏中未

之及也詔行庭樞并勘訪捕大理寺右寺丞林希元  
言作者大同之變朝廷過為姑息故諸悍卒咸有輕  
傷心一有觸發則攘臂而起其勢固然夫都御史天  
子重臣庸碌下卒敢執縛囚辱之是無朝廷也近聞  
差去官鞍亦被囚繫紉俘視大同尤甚本兵大臣乃  
因循不振致叛卒益驕朝廷威令益削此不忠之大  
者也疏人上責希元妄言奏擾官較既被囚繫守臣  
何以隱匿不言今錦衣衛驗狀已錦衣衛指揮王佐  
等亦諱言之上遂怒希元在率數同著降外任遼陽  
叛卒趙剛兒等聞庭樞將至乃詣廣寧與鬻兒合密  
結反罪囚王果劉向上于徽為流言脅誘城中人為  
逆謀益急就密刺二城及撫順所首惡名潛授方畧  
于副總兵李鑑備禦韓承恩等剋期擒捕于是剛兒  
等四人蠻兒等十三人王純等七人同日被獲統以  
事聞且言逆軍無忌白棄生成始因激而倡亂雖無  
素謀終負罪而逞兇漸成不軌夫法不可假情不可  
縱上有假借之法則下多恣肆之情往陝西兵變未  
幾而大同效尤說者曰大同之變所以處陝西之變  
者啓之也大同殺參將殺巡撫未幾而又殺總兵說  
者曰李瑾之變所以處張文錦者啓之也蓋惠竭矣

而威或不伸威行矣而法或未盡蓋爾小醜習於耳目又何忌焉今宜勅欽遣大臣索覈其事據兇逆之原情盡律例之本法至於應參將領等官悉從重究庶可以正國法肅人心得旨首惡既擒不必查勘庭檄取回其餘未盡事情只令巡按御史勘明具奏銑等勘上詔剿兒蠻兒王經等俱坐斬卽時處決泉示尚德麟永成極邊革去世襲雄戍邊衛經革職開住吳令歸別用銑待有京缺陞用諸擒賊八員各查奏陞再召費宏爲大學士八月見費宏文華殿西室賜銀圖書一命盡心入告命雲貴自開科取士甲辰祭夜明上召費宏無逸殿東室曰朕取稼穡艱難之意構茲殿今日召卿庶幾君臣同遊盛美因曰恤民朕志也今四郊七廟兩宮工作皆以奉天奉祖奉親非得已者時三邊缺總制宏薦姚鏌可任上卽內降名



鑄復諭宏恤民在用賢自後吏部推選不當者宜明  
言之以佐朕知之所不逮因賜酒飯出上既責汪鉉  
因數與輔臣言鉉詭佞不稱至是給事中宗愷御史  
獅等十人交章劾鉉上念國體持其疏不下使輔臣  
風鉉去鉉去乃下責宗愷獅負君不先言乘閒探意  
命鎮撫司考訊之杖午門削籍爲民其餘皆降調建  
西海神祠十月己丑時享奉先崇先二殿上問科道  
官汪鉉去誰可冢宰者各舉所知一人聞率不能置  
對第請自上裁上怒曰言官朝廷耳目所望廣聰明  
防壅蔽糾官邪者也邇來阿權畏勢忘義負君卽汪

鉉小人朕久識之矣直以未至大惡姑優待之近與  
二三大臣論及爾等遂竊探乘機至今推舉又疑忌  
不置對奚以言官爲遂褫其長官職皆爲民餘切責  
之修獻皇帝誕宮曰啓祥宮費宏卒于位十一月冊  
封淑女曹氏爲端嬪告廟受賀庚午視牲南郊壬申  
月食乙卯郊上曰兩京祭酒士表也今其廷推著爲  
令十二月封新塏爲晉王顯榕爲楚王田州土目盧  
蘇殺本州州判岑邦相以叛湖廣九溪灣諸處峒賊  
平

十五年正月丁巳朔上朝以宗廟未成簡朝禮春享

疾遣代二月上曰朕元旦偶中風寒不能強起比者雨雪氣候如冬朕體素弱尚當謹攝祈穀之祭暫令太傅勛代今虜外警而盜內訌司兵食者尤宜竭思靖圖朕非宴怠所以愛養此身庶幾精神充固可希儲嗣耳三月設大田縣加致一真人邵元節道號製正二品朝祭等冠服如文官并玉帶賜之上諭夏言朕將謁陵天壽山且預作山陵焉言對預山陵重事也請遣欽天監官相兆得兆以報然後併修謁禮焉上曰作陵而謁陵不敬其先修顓謁禮相兆得兆朕乃復視之又朕欲一如西山拜宣廟廢后景皇帝二

陵也其山陵預建量倣長陵之規重加抑殺紙衣瓦棺朕恒念之丙子奉皇太后率皇后謁七陵擇陵域十八道嶺見官吏書生父老昌平州復稅糧三之一轉祭二陵西山泛舟西湖還四月以謁七陵遂遣祭孝顯二陵暫時享奉先崇先二殿上諭輔臣時曰朕之不德遽自圖以勞百姓朕心愧懼預山陵可勅問臣民許我否勅曰朕恭建郊壇廟寢所以上事天地祖宗非得已也太皇太后皇太后居清寧仁壽二宮清寧宮故太子宫仁壽宮統于乾清宮皆非所以奉母后今擬卽清寧後半作太皇太后宮卽仁壽故址

并除內大善佛殿作皇太后宮以備皇祖一代制亦  
自謂非妄舉矣復自念原始要終以知死生欲法皇  
祖故事預建山陵未疇咨于有衆爾臣民其爲朕圖  
行止於是百官耆民合辭請乃從之作武學立講武  
殿以備大閱丙申大禘于太廟甲辰幸天壽山告脩  
七陵預建山陵于諸陵太常卿張鶚肩輿雜乘輿道  
上上勅問翰林科道官曰朕惟爲國以禮大典也皇  
祖用樂舞生於郊廟居之神樂觀兀其潔奉神也其  
人本道士也然嘗于是觀出醴泉焉何今文臣者謂  
是邪人也不宜事郊廟事郊廟當專任進士進士孔

聖之徒矣孔子曰未能事人焉能事鬼神事人者畢  
事尊幼事長臣事君也過君虛位色勃足躩孔子也  
今有進士儒臣鶚卿于太常與同乘與行可賞可陞  
爾其言都給事中禎翰林學士璧等劾鶚大不敬上  
是之命錦衣衛執訊于鎮撫御史杏等翼日乃劾上  
上責其臯慢君臣上下不可犯也一爲之百爲之矣  
已法司當鶚爲民特命適戍之上游九龍池登天壽  
山陟其部婁曰文祖於此飲酒焉名其山曰平臺命  
亭之曰聖蹟更名十八道嶺曰陽翠視景陵曰庠隘  
弗稱我皇祖功德拓崇之五月上諭李時曰君臣宴

樂泰交也少則踈過則耽其與尚書言考太祖太宗  
時賜宴禮朕將以端午日宴至期宴百官奉天殿宴  
畢汎舟西苑特命侯勛學士時尚書言等從使舟夾  
于龍舟歸宴于無逸日以酬卿等山中扈蹕之勞三  
臣稱觴上壽盡歡罷毀大善佛殿改建皇太后宮夏  
言請瘞佛骨於中野上曰瘞中野將來豈無竊發以  
惑愚衆其火之通衢永除之凡燔萬三千餘斤製天  
子武陣及大武龍威冠更作寶璽車輅再召張季敬  
戊寅祭方澤六月西苑清虛殿鑒戒亭成從黃綰勸  
處大同議斥劉源清爲民

先是綰承命大同勸處既至絕不問叛軍事左右供

役悉用大同人衆志稍安有聞鉞薛源楊月者爲  
卒使虜賊歸綰執以付獄反側子遂流言籍籍綰大  
集軍民諗以逆順禍福衆始然又有請拾源月歸  
者綰曰此輩庸奴何能爲中國患虜直牛馬驅之耳  
自今有逆卒自虜來者邊吏執俘之不來卽勿索時  
諸叛卒方挾虜恐憚內地聞綰令大阻百姓知綰足  
恃凡前懼叛卒害者始庸至陳牒綰佯不省而密以  
牒授給賑官令隨里聚陰覈之刻期遣捕獲首惡王  
福勝等若干人有逆黨尚欽者懼不免操刃鳴金倡  
亂歷數術無一應者遂被擒綰復出未獲首惡邪徑  
等名圖形懸榜捕之甲申倡亂及近日兇渠惡黨  
擒獲無遺者遂以其名上論死遣戍有差綰因疏言  
源清永食功憤事之罪璜繼祖祐書榮及都指揮紀  
振鐸撫王寧等乘機撫定之功昇黜雖爲亂兵推戴  
而從正之志可原倣允中功足贖罪乞差次其實罰  
兵科都給事中曾朴等言大同叛卒稔惡無上律所  
謂謀叛非謀殺也今議者曲從輕比於法未盡源清  
誠有罪第往官爲進賢令宸濠之亂倡衆死守保障  
有勞况今非激變者也書榮越職圖功因機成事亦  
可量賞璜繼祖月昧揀美初無可錄倣允中觀釁自



全降志辱身幸免流竄河得覲顏朝列疏下兵部覆  
言未罪在不赦源清當錄曩勞未減倣允中錄用非  
宜璣繼祖等功次宜如縮議得旨源清未情犯深重  
下法司依律議奏給奉命勤勞可嘉陞俸一級仍賞  
銀幣璣繼祖祐各賞銀幣有差書榮振寧等各陞級  
倣允中復原職致仕昇麟調別衛李瑾量加恤典又  
以怵等欺誑奏撥阻亂國是令錦衣衛拷訊已而釋  
之尋逮源清未至京問訊獄久不決縮意不能平疏  
言臣奮身犯難擒獲逆黨議者猶謂臣不盡法以此  
幼臣源清等貪功罔上盜錢穀百萬殺傷無算罪宜  
首戮該部科曲爲之庇而臣所用以擒首惡如紀振  
王寧等雖陞三級皆置閒散將何以示勸懲至是縮  
以憂去上從部議照源清爲  
民降未二級今立功贖罪  
七月肅王貢錄薨重錄

寶訓實錄改神御閣爲皇史宬專藏之別飾景神殿  
以奉列聖御容八月以宗廟未成減賀萬壽禮虜先  
後入涼州莊浪總兵王輔姜夷兩破之論功有差九

月進封宸妃沈氏麗妃閻氏爲貴妃端嬪曹氏爲端  
妃安嬪沈氏爲安妃康嬪杜氏爲康妃冊封盧氏爲  
靖嬪江氏爲恭嬪任氏爲順嬪趙氏爲榮嬪上親定  
預告來歲祀期禮改四孟時享以四立日罷孟冬陵  
祭癸酉祭七陵丁丑還京改謚悼靈皇后十月暫時  
享奉先崇先二殿皇子生上祭南郊詔天下及朝鮮  
安南二國羣臣方請賀地震上曰朕懼上天賀已之  
其脩省三日而露告遷祔孝肅孝穆孝惠三皇后主  
於裕茂二陵殿去睿純二宗廟號以別嫡庶正夫婦  
之紀焉遂奉慰裕茂二陵更定世廟曰獻皇帝之廟

逮先後刑官之寬張延齡獄者十一月宜大延寧皆有警復宣大總制官更名總督虜大掠山西以安南久不廷議征之加謚武宗皇后十二月宗廟成奉太相主於故太廟太宗列聖於新廟脩內奉先殿大脩金錄醮于玄極寶殿七晝夜以謝儲祥以大臣爲上香監禮迎詞導引等使如舊名皇子曰載壑閏十二月廢后張氏薨以宗廟成加上兩宮徽號詔曰王者之政莫不先祀典謂大事在祀與戎也朕以冲愚宗末叨簡上帝俾嗣天位每念于茲切興長懷柰何聖賢緒墮經傳多舛郊祀襲合祭屋下之文廟享洽

室同堂之制褻瀆之甚謂比同牢功德不別太祖莫尊朕用祇聞于皇天默卜于皇祖親簡忠賢與之同力首建四郊正天地之位明陰陽之分創昭穆羣廟以祀祖宗彰太宗爲常尊之主復作太宗廟于羣廟之外表祖功宗德之不遷以饗百世更皇考廟曰獻皇帝廟別擇吉區以避渠水大工悉成遂定五歲大禘禮于太廟以祀皇祖奉太祖配之歲以立春日特享祖宗之廟夏秋冬皆合享于太祖季冬大禘于太廟皇考廟則歲僅四祭避豐禩焉奉安旣備卹典將覃先致孝于慈闈庶仲誠于璇闕恭上兩宮徽號曰

昭聖恭安康惠慈壽皇太后章聖慈仁康靜貞壽皇  
太后慶禮既成推恩宜逮條布于後主者尊承復岷  
王彥沐爵封融燧爲韓王以夏言爲大學士立春特  
享廟虜人入延綏總兵王效白爵大破之論功有差  
以皇嗣生錄邵元節禱祀功加授禮部尚書給文官  
一品服俸